

# Radiomik naalaarniarneq akornuserneqatsaaliniarlugu qanoq iliuuseqartarnissanik Inatsisartut inatsisaat

**§ 1.** Radiomik naalaarniarneq (tamatumani aamma ilaatinneqarlutik TV-kut isiginnaarniarneq radiolu atorlugu angalasunik kiffartuussisut naalaarniartarnerat) akornusersorneqatsaaliniarlugit Naalakkersuisut piginnaatinneqarput nalinginnaasumik aalajangersagaliorsinnaasut elektricitetip sarfaliaa atorlugu apparatit iluaqusersuutillu allat piusut maligaasat qinngornerit atugaasa sakkortunerpaaffissaannik imaluunniit allatut sakkukillilerneqarsinnaanissaannik, tamatumani aamma pineqarput motorit sarfaq atorlugu aallartinneqartartut.

*Imm. 2.* Naalakkersuisut aamma immikkut ittumik aalajangersaaffigisinnaavaat elektricitet atorlugu iluaqusersuutit apparatillu atugaanissaat.

*Imm. 3.* Imm. 1 pillugu nalunaarusiassa atulerpat elektricitetip sarfaliaata annertussusissaanik allamilluunniit nalunaarummi piumasarineqartunit apparatit iluaqusersuutillu allat sakkortunerusut Kalaallit Nunaanni atugassatut eqqunneqarsinnaanngillat, sananeqarsinnaanatik tunniunneqarsinnaassanatillu.

*Imm. 4.* Qamutit motorillit imm. 1-imi piumasarineqartunit nalinginnaasunit allaanerusumik aallartittaateqartut malittarisassap atulerneratigut atorneqarsinnaanngillat.

**§ 2.** Paasineqaraangat apparatit allallu iluaqusersuutit elektricitetitortut § 1, imm. 1-imi nalinginnaasumik aalajangersakkat uniorlugit akornusersuisuusut Naalakkersuisut piumasaqarsinnaapput piginnittup (atuisup) apparati allaluunniit iluaqusersuut elektricitetitortoq akornusersuisorlu aalajangersakkanut naapertuuttumik iluarsartissagaa nammineq aningaasartuutigalugu, apeqqutaatinagu apparati iluaqusersuulluunniit qangarpiaq atugarilersimanerini.

*Imm. 2.* Paasineqaraangat apparatit allallu iluaqusersuutit elektricitetitortut § 1, imm. 1-imi nalinginnaasumik aalajangersakkat unioqqutinngikkaluarlugit akornusersuisuusut Naalakkersuisut piumasaqarsinnaapput piginnittup (atuisup) apparati allaluunniit iluaqusersuut - apeqqutaatinagu apparati allaluunniit iluaqusersuut qangarpiaq atugarilersimanerini - iluarsartissagaa nammineq aningaasartuutigalugu soorlu salitsillugu, nipaallisaaserlugu, frekvens atugaa allanngortillugu imaluunniit piffissaq atorneqartarfa sivikillillugu elektricitet atorlugu sarfaliormerini akornutaasinnaajunnaarlugu nunaqarfigisami radiofonip fjernsynillu aallakaatitaannik tigooqqaaniarnermut.

**§ 3.** Pisoqarsimappat § 1-imi nalinginnaasumik aalajangersakkat imaluunniit § 2-mi immikkut iliuusissat malittarigaluarlugilluunniit radioqarfik akornesersuutaajuartoq Naalakkersuisut piumasaqarsinnaapput piginnittup (atuisup) apparati imaluunniit iluaqusersuut alla allatut qanoq iliuuseqarnermigut

isumannaallisaffigeqqissagaa, kisianni apparatip iluaqusersuutilluunniit iluaqutaaneranut malunniutussamik akornutissinnagu.

*Imm. 2.* Immikkut ittumik akornusitsaaliuimalluni iliuusissanut aningaasartuutit apparatimik iluaqusersuummilluunniit akornusersuisuusumik piginnittup akiligassarai.

**§ 4.** Pisoqarsimappat §§ 1-3 tunngavigigaluarlugilluunniit inuiaqatigiinnut iluaqutaasussamik radioqarfik akornusersugaajuartoq Naalakkersuisut suliniutigisinnaavaat taartisilluni naalagaaffimmut kommunemulluunniit pigisanik tunniussisarnissamik inatsimmi nr. 182, 29. maj 1972-ernisami Kalaallit Nunaannut atuuttussanngorlugit aalajangersakkat naapertorlugit tigusinissartik; taamatulli pisoqartillugu inatsimmi § 2 najoqqutariniarneqarsinnaanngilaq.

*Imm. 2.* Taamatut pigisamik piumasaqaateqarneq ima aaqqinniarneqarsinnaavoq illup sumut atugaasinnaanerani killiliinikkut, tassa aalajangerlugu apparatit imaluunniit iluaqusersuutit elektricitetitortut aalajangersimasuinnaat illumi atugaasinnaalersillugit, imaluunniit illu periarfissarititaasunut akerliusumik allineqarsinnaajunnaarsillugu. Naalakkersuisut aamma illuliorfissanik akuersisartunut piumasarisinnaavaat illup iluaqusersuuteqarfiulluunniit allanngortinniagaanera periarfissarititaasunut akerliusimappat akuersissuteqartaqqunagu, aamma Naalakkersuisut illuliorfissanik akuersisartut piumasaqarfigisinnaavaat periarfissarititaasunut akerliusumik siunertallit sanaartorfigineqaqqunagit imaluunniit nuna illuliorfigineqanngitsoq tamakkununga atugassatut akuersissutigeqqunagu aalajangersarneqarsimasut malillugit tamanna piumasaqaataasimappat. Periarfissarisanik killilersuisuunerit tamakku nalunaarsorneqassapput ajornanngippat kalaallit inuusaasianni pissutsit tunngavigalugit.

**§ 5.** Tigooqqaat akornusersugaasoq nalinginnaasumik akornusersugaasartuniit malussarinnerusimappat imaluunniit inissitaanerliorsimanera tamatumunnga pissutaasimappat piginnittoq (atuisoq) piumaffigineqarsinnaavoq §§ 2-4 aalajangersakkat atornialersinnagit iluaqusersuummut aaqqiissutaasinnaasunik iliuuseqarniaqqullugu.

**§ 6.** Akornusersuut apparatip iluaqusersuutilluunniit elektricitetimoortup kukkusaanerani patsiseqarsimappat imaluunniit ajoqusersuisinnaajunnaarsagaagaluarsimanera kukkusaasimappat Naalakkersuisut piumasarisinnaavaat piginnittup (atuisup) piaarnerpaamik kukkuneq aaqqitsinniassagaa nammineq aningaasartuutigalugu.

*Imm. 2.* § 3 naapertorlugu akornusitsaaliuineq kukkusumilli suliarineqarsimasoq pillugu Naalakkersuisut aalajangersagaliorsinnaapput taamatut pisoqartillugu piginnittoq (atuisoq) iluarsaaqqinnerminut tamakkiisumik ilaannakortumilluunniit aningaasartuuteqassanersoq pillugu.

**§ 7.** Akornusersuutip inuunermut pisariaqarluinnartut imaluunniit inuiaqatigiinnut pisariaqarluinnartumik radiokkut atassuteqaatigineqartut eqqorsimappagit - taamalu inuit allallu inuiaqatigiit ingerlatitaanerannut pingaaruteqarluinnartut navianartorsiortillugit - Naalakkersuisut piumasaqarsinaapput iluaqusersuut piaarnerpaamik unitsinneqassasoq, tamatumanilu pisariaqartumik iliuuseqarnissaq Naalakkersuisut isumagisassaraat.

**§ 8.** Inatsimmik matuminnga atuinnermut nakkutilliisitsiniarlutik Naalakkersuisut makkunnga pisumasaqarsinnaapput:

- 1) Apparati iluaqusersuutillu allat elektricitet atorlugu ingerlateqartut Kalaallit Nunaannut tunineqalersinnagit atugassiissutigineqalersinnagilluunniit piunasaqaatigissallugu radiomut qanoq akornusersuisinnaatigineriniq uuttorneqarnerinut allagartaq uppersarsaat.
- 2) Apparati iluaqusersuutillu allat uppersarsineqarsinnaasut maligaasaliernerit killissarititaasut sinnerlugit suliaasimasut tunineqarnissaat atugassiissutigineqarnissaallu inerteqqutigissallugu.
- 3) Apparatinik iluaqusersuutinillu allanik elektricitet atorlugu ingerlateqartunik tuniniaasut peqqussallugit Naalakkersuisut aalajangersagariumaagassaat naapertorlugu aammalu aalajangersakkani nr. 2 malillugu inerteqquteqarneq tunngavigalugu tunisaraluutik uterteqqullugit uterteqqeqqullugillu.

**§ 9.** Elektricitetitortunik pigisallit atuisullu, tamatumani aamma radioqartut fjernsyneqartullu, kiisalu suliffeqarfiit tamakkuliortartut, tikiussuisitsisartut tuniniaasartullu apparatinik allanilluunniit iluaqusersuutinik elektricitetitortunik immikkut eqqartuussisut saaffigeqqaanngikkaluarlugit Naalakkersuisut tamakkuninnga misissuisussaataat ajornarsaarussinnaanngilaat misissuinissaannut imaluunniit elektricitetitortuutimik ilaannik radiomik naalaarniarnermut akornutaasorinartunik misissugassamittut tigusi gallarnissaannik.

**§ 10.** Naalakkersuisut aalajangersagaliorsinnaapput:

- 1) § 1-imini nalinginnaasumik aalajangersakkat atuutitinneqarnissaat anguniarlugu apparatinik iluaqusersuutinillu pisaarnianut akuersissuteqartarnissaminnik pisaarineqartunillu nalunaaquttersuisarnissaminnik.
- 2) akuersissutigisinnaallugu apparatinik iluaqusersuutinillu pineqartunik nioqqutissiortartut nioqquteqartartullu qanoq atsigisumik akileraartitaasarnissaasa (afgift) annertussuseqarnissaat.

**§ 11.** Ataatsimoorussamik antenneqarfiliorniernerit taakkulu ulluinnarni ingerlatinnerat pillugu teknikkikkut tunngasumik qanoq ilioqqusissutinik Naalakkersuisut aalajangiisinnaapput, aamma antenneqarfimmik piginneqataasuugalulluunniit apparatinik akornusersuisinnaasunik atuinissaat inerteqqutigisinnaallugu.

**§ 12.** Naalakkersuisut Grønlands Televæsen piginnaatissinnaavaat inatsimmi matumani Naalakkersuisunut isumageqquneqartut nalinginnaasumik suliarisaqqullugit.

*Imm. 2.* Taamatut piginnaatitsinissamik aalajangersagaliortoqartinngu Grønlands Televæsenip manna tikillugu televæsenimut isumagititaasarsimasut ingerlatiinnassavai.

*Imm. 3.* Kalaallit Nunaanni Nalunaarasuartaaserisoqarfiup aalajangigaanik maalaarutit Naalakkersuisunut tunniunneqarsinnaapput.

*Imm. 4.* Kalaallit Nunaanni radiomik naalaarniarnermut akornusersuutaasartut pillugit ingerlatsinermi aningaasartuutaasartut Grønlands Televæsenip ingerlatalarugillu akilertassavai.

**§ 13.** Akiliisinneqarsinnaapput

- 1) § 1, imm. 2-mi aalajangersakkanik unioqqutitsisut,

- 2) § 1, imm. 3-mi aalajangersakkanik unioqqutitsisumik tikisitsisut, sanaartortut imaluunniit atugassiissuteqartut,
- 3) § 1, imm. 4-mi aalajangersakkanik unioqqutitsisumik qamutininik motorilinnik atuisut,
- 4) §§-ini 2, 3, 6, 7, 8 imalt. 9 peqqussutigeqqusaasunik, inerteqqutaasunik inassutigisaasunillu unioqqutitsisut imaluunniit
- 5) § 4 malillugu periarfissarititatus qaangeqqusaanngitsunik qaangiisimasut.

*Imm. 2.* Aamma unioqqutitsisunik atortoqartut pigisaminnik arsaarneqarsinnaapput.

*Imm. 3.* Naalakkersuisut inatsimmi uani pineqartut §§-it 1,8, 10 aamma 11 nalunaarusiornermikkut maleruagassiorsinnaavaat, taakkunaniittunillu unioqqutitsinerit akiliisitsinermik pigisamillu arsaarinninnermik kinguneqartissinnaallugit.

*Imm. 4.* Piginneqatigiiffiit, soorlu aktieselskabit, anpartsselskabit, andelsselskabit, peqatigiiffiit allalluunniit taamatut naatsorsuunneqartariaqartut, unioqqutitsisimappata selskabi peqatigiiffilluunniit peqquneqarsinnaavoq akiliissutissaq akisussaaffigeqqullugu arsaagaasinnaallutillu. Tamanna aamma atuutissaq kommunep imaluunniit kommuneqarfikkuutaartoqatigiit ingerlataannut.

**§ 14.** Inatsisartut inatsisaat una atuutinngilaq radiokkut atassuteqartarneq pillugu 6. april 1976-ernisamik inatsimmik nalunaarut nr. 210 naapertorlugu radiokkut aallakaatitsiviit akornusersuisinnaanerannut.

**§ 15.** Inatsisartut inatsisaat 1.januar 1988 atuutilissaaq.

*Namminersornerullutik Oqartussat, ulloq 15. december 1987*

Jonathan Motzfeldt

/

Aqqaluk Lynge

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

